

于湖居士文集

二

于湖居士文集卷第一

賦

金沙堆

洞庭之野吞楚七澤乘秋而霽天水一色
登高桅以掛席兮插余舟之兩翼凌長風
以破浪兮駭掀舞於一葉橫中流而北望
兮何黃金之突兀觸白日以騰耀兮疑波
神之汎宅舟人告余曰此金沙堆也壁立
千仞衡亘百步靈鰲之背孤起以自暴兮
棄方丈而不負湧青城之玉局兮遲虛皇

二十八口

三湖一

水受

靈皇

一作

而來下太倉露積以弗校兮白粲

粲而非腐燠海波以出素兮莽既多而無
數胡山十丈之雪結而不復釋兮吳江八
月之潮來而不復去諒非目見而心識兮
雖巧譬其焉喻客有嘆曰擊土為城隱以
金椎一雨之暴或傾以摧之今此沙也質
輕而性離得水而走得風而飛澶漫乎大
漠之北飄流乎崑丘之西曷稽天之巨浸
兮獨與此而相宜廉隅峻以特起兮若斗
之覆而四維潦盡不為之高兮春既漲不



爲之卑風揭石以拔木兮蛟鼉駕海而上
馳捲近岸之丘阜兮若烈火焚乎枯萁謂
此沙旣無有兮當散入於渺瀰旦起而視
之兮曾無毫髮之或夷豈與息壤同生兮
爲上帝之所私將富媪之多藏兮萬寶萃
而在茲豈女媧五色之石兮宇天漏之所
遺將神禹治水兮聚九野之土以補東南
之虧豈劫火之灰兮歲旣久而莫移將神
龍之攸居兮百鬼夜築而守之徵至理而
莫得兮願先生之予思也張子笑之曰子
來前天地之間何所不有遠者莫諱近或
可取今夫積水爲冰及春而澌此物之常
理也然凌人氏乃得而藏之聖其土使地
氣無所洩厚其覆使天氣不得下天且暑
矣於是方謹而獻之夫以一人之私猶能
變易陰陽之度而况天地之大乎沙之積
不積流不流安所置論子行矣

辭

攻蚊

后皇嘉生物有群些強者熊虎弱羔獮些

畜我遠我區以分些各保性命不相紛些
爾獨何化以爲蚊些匪強匪弱孰使云些
廉纖么麼毒所熏些利喙短翼飛翁翁些
羸腹曲脚豹成文些藏陰伏翳須日曛些
黴類嘯族乘惡氛些渙散揮霍絲之焚些
緣頭撲臂來如雲些入隙伺罅霰雪雰些
伊伊滷滷相懽忻些嗜膚吮血飽以醺些
前捷甫去後亦塵些無可柰何夕及昕些
引鏡自照面纈紋些客或告我祈火君些
彼嗜臭惡憎芳芬些謀野則獲采蕭薰些

載暴載熨烟網緼些儻不退聽秉烈焚些
如彼即墨殲燕軍些焦腸爛腹翅羽旄些
舉徒盡殪永不聞些涼霄大枕奏厥勲些
豈其不仁我則懂些當斷不斷露汝筋些

祭金沙堆廟

憺九秋之半兮絕洞庭予將歸登磊石以
遐矚兮天水莽而相圍鯨波浩其呼洶兮
蛟鱉擇食以自肥盲風憑怒無時期兮橫
中流吾焉依舟人諗余以湖君之神靈兮
曰甚仁而文威若著龜之可信兮盍繫齊

而致祈嗟余禱之既久兮豈夫神今日之
我違晨光杲其東外兮破積霧之霏微疑
秋霽之萬頃兮檣烏轉而北飛棹夫集合
以奏功兮若駟馬熟路而駢駢寄千里於
一瞬息兮才舉手而一揮如靈宮以午泊
兮目眩積沙之輝隨濤波以上下兮岌金
城之巍巍信真仙之攸宅兮羗見聞之所
稀粉墻行樹繚以直兮鋪首鳴其朱扉儼
帝服之中居兮亦班寵于厥妃來牲酒之
雜還兮紛蒲堂之芳菲懷沙大夫之侑食

兮噫孰知其是非鳥喙魚服沙鱗鯉鮪
盱以列侍兮駭怪譎之裳衣蓋專制楚之
七澤兮實參握乎天威者也由余役之既
久兮闕水菽於庭闈瞻白雲以延望兮朝
濟至乎夕暉苟利涉以遄達兮豈妄福之
敢希感神貺余以獨厚兮銘肺一本作膺而
三欵跪陳辭而侑觴兮聊彷彿其音徽

頌

壽芝頌代揔得居士上鄭漕并序

上既專任一德方內底定眷江之北昔爲
戰墟生聚教訓十年于茲矣曰疇予寶臣
持節以豈弟德惠爲予撫綏之百辟卿士
再拜言漕江東臣某再考績爲天下最宜
可上曰俞哉於是有詔華原增秩摠部淮
南十有六州詔下之日淮民歡呼奔走相
告自州達之縣自縣達之田里自田里達
之窮巖幽谷公江東之治仁聲義氣漸被
于兩淮故淮民間公之來其喜如此越翌
日歷陽郡東鄙樵民有得異草于松根者
郡人張某寔公門下士屬公誕辰甫及當
有頌詩形容盛德廼以九月吉旦潔齊執
筆爲文未有緒俯而假寐若有告者曰姑
置之天將以芝畀女爲公壽某驚悟已而
樵民奉芝欸門曰疇昔獲此弗之識而神
夢謂余是蓋所謂芝者天以華原公將持
節吾土是生靈物而爲瑞且此月之十日
則公生之日是芝則又昭示公難老之徵
若里人有張氏者寔公客亟歸之俾得獻
公不者禍女神言如是我懼是以來某亦

解昨者假寐若告之言盛服再拜而受之
信芝也一本二榦高廣有咫堅密溫潤色
如紫玉輪困蒼鬱駢爲七枝華葉敷芳則
十有四藹然若卿雲捧日燦然若竒葩豔
春噫戲異哉未曾有也神之命公可謂深
切著明矣不知天之於人相去遠近而其
物類之感召如是其敏且速耶且以公將
持節西州而爲呈瑞則胡不降甘露流醴
泉異畝同穎鳳皇翔集耶不以是數者爲
應而應以芝天意若曰芝上瑞也不春而

華不秋而實不根而植翦而置之雖歷數
千百年而猶敷腴充實則芝非特上瑞又
壽草也天與公瑞則於除命之後瑞草發
於淮西之境天與公壽則生朝之前壽草
產於古松之下物像昭顯決非偶然者鄉
惟甘露醴泉嘉禾翔鳳之來謂之祥瑞則
可矣烏在其爲壽徵也於以見天之錫公
富貴壽考廣大繁昌有永無極豈兩淮之
民獨受其福將天下生靈寔受其福豈公
獨有其瑞將朝廷國家寔有其瑞然則此

芝之來所繫大矣哉謹拜手稽首而爲之
頌曰

濯濯靈芝施于古松天錫珍祥以壽鄭公
文武鄭公其德孔碩文正之子柔嘉維則
天子命公汝予寶臣宣力四方其牖我民
公拜稽首奉天子命自西徂東惟一其政
孰寒而飢公衣食之孰癘而疝公藥治之
孰獷不率則訓則治孰姦賊民則耨則夷
條踈節披罔亦不冝天子命公汝有成績
盍其歸矣箴補袞職淮堧奕奕其疆千里

三十三

二湖集一

七

三右新

奠國北門孰與予理在列咸咨曰公克任
天子命公輟女往鎮公來之初靈芝則生
亦以壽公寵錫百朋蔚彼芝矣厥生孔時
爰發其祥以公來綏蔚彼芝矣公介眉壽
數百千祀與國長久神則有言芝以瑞公
入侍帝旁九旒外龍神則有言芝以壽公
楚南春秋綠髮方瞳我作頌詩式詔罔極
誕保休徵有永無斁

樂章

降神

於神何司而德於木肅然顧歆則我斯福
我祀孔時我心載祗匪我之私神來不來

又

神兮焉居神在震方仁以爲宅秉天之陽
神之來矣道脩以阻望神未來使我心苦

又

神在途矣習習以風百君後先敢一不恭
奔走癘疫被除菑凶顧瞻下方消搖從容

又

溫然仁矣熙然春矣龍駕帝服穆將臨矣

一百廿八

千湖集一

八

王若新

我酒清矣我肴烝矣我樂備矣我神顧矣

升降壇

在國之東有壇崇成節以和樂式降式登
潔我珮服璆琳鏘鳴匪壇斯高曷妥厥靈

青帝位奠幣

物物熙熙胡爲其然蒙神之休乃莫報旃
有邛斯珪有量斯幣于以奠之格此精意

太昊位奠幣

卜歲之初我迎春旗孰克侑饗曰古宓戲

於皇後闕

于湖居士文集卷第一

于湖居士文集卷第二

古詩

和何子應賦不欺室韻

隆興天子開千齡六龍飛天動潛鱗東嘉
先生初召對不欺之論驚廷目誰令浮雲
蔽白日脫幘歸來環堵室巍巍烏府憶霜
簡凜凜螭坳有椽筆魏公眼力無餘子與
公周旋豈其死請公細讀不欺銘一字之
褒如魯史

讀中興碑

繡紉兒啼思塞酥重牀燎香驅羣胡阿環
錦鞵無尋處一夜驚眠搖帳柱胡方天子
神爲謀三郎歸來長慶樓樓前拜舞作竒
崇中興之功不贖罪日光玉潔十丈碑蛟
龍蟠拏與天齊北望神臯雙淚落祗今何
人老文學

題張仲欽所藏隆茂宗畫登瀛圖

老隆已死畫筆枯畫歸天上人間無公從
何處得此圖眼明嶺海三歎吁天策上將
天爲徒指揮羣龍清八區褒鄂英衛供埽

除功成告廟金模胡歌童舞女不願渠乃
此數士相爲娛鐵面苦口談詩書直欲措
世如唐虞老隆妙手神所摹蒼頭廬兒亦
敷腴祝公歸直承明廬願持此道補帝裾

題蔡濟忠所摹御府米帖

生前官職但執戟身後一字萬金直當時
雷霆下收拾世間不復有遺逸上清虛皇
手自擇編星爲囊雲作笈流鈴擲火守護
密君從何處見真跡知君定通玉帝籍太
微垣中賜餘墨龍騰虎卧摹不得想君神
授五色筆江南鈎鎖腕中力釵折屋漏千
態出整整十卷字猶濕光彩激射海爲立
平生我亦有書癖對此懍怵心若失口吐
汗下屢太息十日把玩不得食作牋天公
拜稽首乞我此老生時一雙手爲君痛飲
百斛酒墨池如江筆如帚一掃萬字不停
肘

賦王唐卿廬山所得靈壁石

湘江竹深韶不傳后夔神禹飛上天泗濱
之磬無人編帝敕此寶淪深淵於乎不知

幾千年奇形異質鬼所鑄青虬赤虎遭縛
纏蹙筋怒爪身孿拳自從胡塵障中原神
物變化隨霏煙金聲玉振義不辱六丁徒
置康廬巔靈臺星官未知處但恠寶氣干
霄躔王郎齋居粵淺原飲水泣血天所憐
空山無人下羣仙似夢非夢或告旃捫蘿
獨上果有得失喜而懼心茫然百失挽取
自包裹解衣更買蠻兒氈絨局不肯鄉人
說知我好古容觀瞻焚香再拜婁歎息安
得致之天子前安得致之天子前明堂郊

丘備宮縣調和正聲薦上帝簫勺羣慝收
戈鋌朝廷清明用耆哲一律四海歸陶甄
鳳皇來儀獸率舞復古却到虞韶邊是時
賦公筆如椽襍牋爲草登歌篇

月之四日至南陵大雨江邊之圩
已有沒者入鄱陽境中山田乃以
無雨爲病偶成一章呈王龜齡

圩田雨多水拍拍山田政作龜兆拆兩般
種田一般苦一處祈晴一祈雨去年水大高
田熟低田不收一粒穀只今萬錢糴一斛浙

西排門煮稀粥聖神天子如堯湯曰雨而雨
暘而暘天公廣大豈有意爾自作孽非天殃
近得一二硯示范達甫笑以爲堪
支牀也許送端州大硯作詩以堅
其約

范郎紫玉餘半圭翻手作雲雨電隨龍蛇
起陸孔翠飛雲收雨霽千首詩薦以文錦
盤珠璣夜光發屋隣翁知桂州刺史書成
癡單車萬里日夜馳囊中已無去年錐欠
此石友相娛嬉范郎笑我支牀龜忽遣致
我重寶齊金印如斗不願携愛此直欲忘
朝飢君行題輿古端溪溪石醜好紛不齊
溪邊之人足謾欺須君眼力爲辨之更作
萬斛之墨池爲君大書十丈碑

劉倅示崇寧上舍題名翰林其父
也

崇寧天子開皇極發揮神謨詔羣辟十八
學士天與力攀鱗附鳳才一日翰林尚書
古遺直不作三公奄窳窳當時盛事刊樂
石後五十年已今昔令我再拜三嘆息尚

有之子似世德不羸其躬且赫奕

黃外卿送棕鞋

編棕織蒲繩作底輕涼堅密穩稱趾帝庭
無復夢絲絢上客還同貺珠履我家江南
山水窟日日行山勞屐齒感君投贈欲別
時布鞵青鞋從此始亨衢知子方着脚直
上雲霄三萬里泰階歷盡却歸來赤舄一
雙應几几

贈張欽州

張家承平四姓侯門前列戟金成丘南來

三百一十

二湖二

五

莫

清貧家立壁但有萬卷書滿樓雲山極觀
半空寫下有花竹秀而野閉門讀易已三
年樂天知命忘華顛我行湘中識此老難
兄莫年更枯槁從來戚畹須表勸會聽鳴
珂趁朝早衡陽小隱雖深幽去天尺五君
無留貂蟬堦螿何足道君必不爲猿鶴羞

賦沈商卿硯

石渠東觀天尺五壁星下直圖書府琳琅
寶鎮出三代浩瀚簡編照千古右文儲硯
一百九鈿匣珠囊護瓊玖有時清夜發光

怪諸儒縱觀容拜手一收朝蹟歸故園瓦
池葦管塗突煙夢尋清都故歷歷起凭書
按空潛然眼明見此超萬石色如馬肝涵
玉質白圭之玷尚可磨澁不拒筆滑留墨
摩挲太息不自己呼兒汲甘爲湔洗天遺
至寶瑞吾子要與詞林壯根柢子行飛騫
爲時須西清承明有佳除收功翰墨儻乞
我田間自抄種樹書

大雨呈同行諸公

我舡千斛初甚遲上灘下灘風薄之百夫

三十三

二湖二

六

陳東

撐挽才得過水淺舟大行無期同來賓客
笑鈍滯一葉自買如鳧鷖瞥波急槳亂藻
荇瞬息不見飈車馳忽然昨夜雷雨作黑
雲頽山風卷壑龍門春漲魚鼈亂牛渚宵
明鬼神惡蓬翻纜斷泊不得客只一身無
處着長年絕叫客驚起一浪先掀半舡水
囊衣漂盡到巾屨一夜奔忙沙石裏我時
甘寢殊不覺但怪颼颼風到耳起來呼酒
目勞苦水蒲涼生差可喜鄉來笑者今却
悲人生淹速那能知明朝轉柁我舡快喚

客同舡莫嫌隘

吳城阻風

吳城山頭三日風白浪如屋雲埋空北來
大舡氣勢雄車帆打鼓聲聶聶我舡政爾
不得去跼促沙岸如鳧翁長年三老屢彈
指六月何曾北風起由來官儂多齟齬世
不汝諧神亦爾我愧此言呼使前順風逆
風皆偶然皇天廣大豈有意想汝嗔喜庸
非偏瓶中有粟囊有錢與汝飽飯姑留連

金沙堆

玻璃盆中金作堆葯房桂棟中天開洞庭
無底蛟蜃惡君不喚我那能來旁舡守風
四十日我行昨夜到磊石山頭望君乞杯
玃僮僕歡呼得頭擲二更南風轉旗脚打
鼓開舡曉星落秋光淨洗八百里亭午投
君廟前泊斬牲醜酒報君德君今清都豈
其食聊須醉飽撐舡儂明日依舊行南風

欲雪

欲雪未雪天模胡凍行沙尾鷓鴣呼北風
刮耳立不住更騎鈍馬穿枯蘆兩生憐我

意不舒江頭三日占檣烏高堂明朝置安
輿買羊沽酒償勤渠

鑑湖納涼

鑑湖周圍三百里極目平波清到底荷花
歲久生滿湖人來採蓮唱歌起賀家千頃
水雲鄉六月荷花風最涼短楫輕舟來斷
續山橫曉月正蒼蒼

和沈教授子壽賦雪三首

北風吹來燕山雪十萬王師方浴鐵風纏
熊虎靈旗靜凍合蛟龍寶刀折何人夜縛
吳元濟我欲從之九原隔東南固自王氣
勝西北那憂陣雲結豈無祖逖去誓江已
有辛毗來仗節

又

今年米貴更風雪破屋荒涼冷於鐵道人
三日不出門卧聽欹簷竹枝折高吟忽送
三十韻覲面未覺千里隔此公也自可憐
人家徒四壁衣鶉結君不見漢時蘇子卿
窖中齧氈終持節

又

天公作劇已三白刮面東風利如鐵只今
斗米錢數百更說流民心欲折胡兒打圍
涂塘北煙火穹廬一江隔陛下宵衣甚焦
勞微目私憂長鬱結爾曹忍凍不足說我
輩何時立竒節

鄱陽史君王龜齡閔雨再賦一首

老農歌舞手作拍一雨紛紛稻花拆去年
秋田旱政苦史君隨車有甘雨旁州不熟
我州熟至今中家有藏穀地確舂秬珠滿
斛老農左餐仍右粥使君行矣伊佐湯緝
熙和氣無常暘豈徒一雨潤九穀要爲萬
物除千殃

喜晴賦呈常守葉夢錫

史君憂民出至誠欲晴未晴天所矜白衣
老人無逢迎香火未收東方明指揮六龍
扶日行羣陰卷盡見太清女擷柔桑男趁
耕熙熙和氣滿春城去年歲事已如許田
頭試聽老農語淅西更着五日雨麥根爛
盡種不土

去年永州逢七夕今年衡州逢七夕往來
不敢怨道路迎送但知慚吏卒年年七夕
有定時我行屬天那得知東西南北會逢
汝但願強健無所苦

謝劉恭父玉潭月色真石室之賜

玉潭月色冽以清石室千里猶典刑何人
遺我雙玉瓶武夷先生翰林卿約束風雨
驅雷霆長鯨夜吸川爲傾明朝風止醉不
醒扁舟徑度君山青

從張欽夫覓紙

蜀江擣麻色勝玉百金才能致一幅君家
入則充棟宇再拜米肯乞纖粟爲君破慳
作此詩擔囊揭篋應有時比鄰寒亡忌唇
齒君但勤渠送川紙

幽興

海涵太陰日西墜盡角一聲城欲閉柴門
關上濯足眠萬事不如高枕睡睡鄉廣大
能我容兀兀騰騰興莫窮推枕起瞻河漢
曉月明庭竹響清風

于湖居士文集卷第二

于湖居士文集卷第三

古詩

麒麟硯滴分韻得文字

素王西狩麟筆削昌斯文茂陵一角獸妙
語聞終軍壯哉筆硯間英姿欲拏雲名參
龜龍瑞威掃狐兔羣豈獨濡毫端政爾清
妖氛會當獻君王玉殿春夜分輸寫膏中
竒恩波被無垠

諸公分韻躡冒頓之區落焚老上

之龍庭得老庭字

橫槊能賦詩下馬具檄草忠義乃天賦勲
名要時早龍卧南陽客鷹揚渭濱老當其
尚棲遲衆或輕潦倒風雲會相遇氛祲當
獨掃鳳皇翔千仞駑馬顧棧阜士爲一飽
謀懸知不同道

又

吳甲組練明吳鉤瑩青萍戰士三百萬猛
將森列星揮戈却白日飲渴枯滄溟如何
天驕子敢來干大刑嗚呼三十年中原飽
羶腥陛下極涵容宗祊甚威靈犬羊爾何

知臬鏡心未寧囊血規射天蒼蠅混驚霆
佛狸定送死榆關不須扃虜勢看破竹我
師真建瓴便當收咸陽政爾空朔庭明堂
朝玉帛劔佩鳴東丁八章車攻詩十丈燕
然銘我學益荒落尚可寫一作紀汗青

柳子酒榼

矮胡生南方託家碧山崖採擇供貢筐扶
持上天街愧此愿慙姿欲售久未諧道傍
趨先生風味故自佳逢渠即傾蓋輸寫能
開懷刮削出光彩規繩去歆侷金玉豈足

三

二湖三

二

以反

貴膠漆真吾儕客來有嘉招二士往必偕
婆娑止坐隅供饋煩金釵矮胡雖木強醇
德真無涯虛心實其腹居然外形骸微物
幸見用棄置理則乖毛穎有封國陶匏薦
欽柴大藥起世痾炮燔及根芟願子自洗
濯勿受塵埃埋暇日肯相從醉經坐高齋

赭山分韻得成葉字

昨日一尺雪今朝十分晴杲日上積雪光
若虹氣升江平鏡新磨地迥玉琢成赭山
有令色令我白眼青借馬屋東家喚客踏

層冰冒貂挾裘茸石路五里平竹樹紛掩
冉珠幢間霓旌野僧不慣客倉皇門前迎
屋古少完壁堂虛有危登石上迹宛宛山
腰塔亭亭劫火偶不燒百年費支撐我有
一尊酒高處得細傾諒非無事飲憂國空
含情長歌眇寥廓歸路已戴星

又

萬生紛不同宿昔有定業哀哉彼遷民苦
事乃稠疊纍纍庭際炊采采澗底葉問渠
胡爲來悲淚不盈睫連年避胡亂生理安

二百八十七

二湖三

三

七

可說今年更倉皇芻藁亦焚劫扶持過江
南十口四五活斗米六百錢兼旬又風雪
前時詔書下振廩要周浹聖主甚哀矜我
曹空感咽願今兵革罷復得理歸楫傳聞
菰蒲中相殺血新喋本是耕田農飢寒實
毆脅須公語縣吏早與支米帖

重入昭亭賦二十韻

我本山中人對山輒忻然蹉跎落世網欲
去常拘牽倉鷹着珠鞬側腦思高騫青絲
絡奔驥擺脫意乃便抑鬱不自聊沉冥向

誰宣長懷昭亭山積翠摩青天下有千柱
宮突兀數百年往者雪中游羣峯玉田旋
飛閣出木末下睨春無邊堂中二老人龍
象開法筵炯炯月在空浩浩海納川應庵
默無言妙處心已傳如庵說千偈微辭諦
真詮靜極炷爐熏對床且安眠更欲捐冠
簪一簞寄三椽此志竟不遂緇塵亂歸鞵
今朝復何朝却望山中煙縹緲見樓觀鍾
梵聲清圓我携九節筇飛步雲蘿巔

登馬氏永寧閣和朱漕元順分韻

三言下五

二湖三

四

俞文俊

佛宮昔誰營猶挾蓋世氣應慚割據醜稍
識苦空味重簷隱白日隆棟湧金地耿耿
壁間像尚可將千騎鄉來歌舞處荒棘擁
城雉惟此悲願成歷劫更興起橫撞鍾萬
石妙響警昏醉憶當風雪辰茲事實經始
老僧喜成就膜拜顙有泚喚客饌伊蒲齋
房頗深邃空巖才跬步不往獨何謂徑携
雙竹杖脚力勇難制繡衣兩使者風誼我
所畏相逢瘴海上此樂豈天惠山林與心
會風月可回施聊乘簿書隙拚此一日費

摩挲水邊石勝處欲專美不用濡漆書公
詩即行記

再用韻呈仲欽元順

今時朱仲欽文字有奇氣潛幽覩天奧雋
永得古味袖手閱世紛虛心餘樂地那持
瘴野節不從羽林騎埋輪吾宗英補袞五
色雉去年對延英御坐再三起憂民甚已
溺稽古乃心醉天衢行日月發軔從此始
會當紀鴻業我筆墨先泚相期並徵詔禁
殿直清邃尚憶此追游班中語相謂我懷
江湖去初服反芟制閑邊靜成趣岐路險
多畏此事屬兩君它年儻終惠長篇起予
病妙語充法施調高和難工初學慚紙費
郊原春無數風日極清美已遣具方舟重
游更湏記

贈江清卿

吾友林少穎讀書不計屋抄書手生繭照
書眼如燭徃時羣玉府上直對床宿夜半
聞吾伊我睡已再熟此君抱高節雪栢映
霜竹造物乃兒戲卧病在空谷尚能作手

書寄我成一束我懶更愧渠終歲不報復
今來見江子少穎儼在目不必不如師惟
子肖甚速持身嚴法律自愛比冰玉學官
冷徹骨三月食無肉危坐談仁義口吻若
布穀時能從我游騎馬踏溪淥定自我輩
人曾次不碌碌惟皇開洪業大厦非一木
豈有梁棟姿而令久淹辱願子益寵珍即
日馬首北我懷山林去掃迹混樵牧躬耕
得薄少持用供水菽稍遠聲利場真勝萬
鍾祿但恨與子別醉語成諄復因書寄少
穎以寫我心曲

和蔡濟忠天字韻

憶我初識君屈指今七年鹽車着騏驎駑
蹇紛爭先謂當對清閑帝席半夜前稍使
修世官復近尺五天如何尚朱紱亦墮嶺
海邊前山春色多佳樹午陰圓散策履幽
徑方舟下長川心目得開明語笑爲芳鮮
但恨暝色至不得窮攀援尚欲夜然犀下
照蛟龍淵清遊渺灘繼歸夢蒼山巔須君
換鵝帖更叙山陰賢

考試呈周茂振舍人陳季陵國正
胷中五斗棘厭此十日讀紛然湘羅帕猶
作春筍束先生擇法眼一閱不再復探囊
得至寶每出輒驚俗孟公更超絕涇渭飽
渟瀟從容了官事繭紙唾珠玉鄙夫聞道
晚銜鑑恐不足冥搜夜無寐慚愧費宮燭
何時即三昧屈指社甕熟秋容日夕好應
到堂前菊

和子雲白蓮

仙人玉步搖佛子白練衣新粧水底明素
手風中揮盈盈夜露光灑灑秋江肥寒月
分好色朝霞借餘輝遙聞功德水盡洗幻
化非惟此妙花幢坐受諸天圍鄉來孤山
遊未覺所見稀零落塞草邊相逢故依依
結實須及早要令飽霜威采剥登君盤勿
嫌此么微

與趙李二同年夜飲有懷石使君

惠叔

佳月久不見忽見如故人清風何方來過
我孤竹君我有一尊酒政爲二子斟會此

風月宵更覺語笑新北城石先生欲喚不
敢頻坐上欠此客長懷渺無津南方鳳之
徒瑞世五色文鐵石賦梅花一洗瘴海氛
臺家須貢珍我欲列九閭且補諫官闕日
酌白獸尊

金沙堆廟有曰忠潔侯者屈大夫
也感之賦詩

伍君爲濤頭妬婦名河津那知屈大夫亦
作主水神我識大夫公自托肺腑親獨醒
梗羣昏聚臭醜一薰瀝血摧心肝懷襄如
不聞已矣無柰何質之雲中君天門開九
重帝曰哀汝勤狹世非汝留賜汝班列真
司命馳先驅太一諏吉辰翩然乘回風脫
迹此水濱朱宮紫貝闕冠珮儼以珍宓妃
與娥女脩潔充下陳至今幾千年玉顏凜
如新楚人殊不知謂公果沉淪年年作端
午兒戲公應嗔

詠雪

東皇携春來屬車載霓裳回風作妙舞雜
珮鳴珠璫千官玉笋班再拜稱瑤觴酒罷

各分瑞圭琮粲琳琅浩蕩涵濡恩一笑徧
八荒塵垢得湔洗焦枯亦輝光偉哉造化
力天地爲翁張功成了不居杲日天中央

題朱元順浯溪圖

去年過浯溪王事有期程夜半度湘水但
見天上星平生中興碑夢入紫翠屏已辦
北歸時十日窮攀登今朝復何朝忽此短
軸橫歷歷眼中見湘山無數青白雲著山
腰樓閣秋氣明便欲扶短策下濯滄浪纓
主人山水仙妙處心自評元顏骨已冷千
載交蓋傾賞音寄幅紙益見忠孝情題詩
疥公畫託我不朽名

寄題向彥績史君采菊堂

史君天資高夙昔事幽屏長懷渺丘壑餘
習謝鍾鼎東籬羲皇人槁死骨已冷淒其
千載後妙處一笑領高堂娛白髮兄弟極
整整不須南陽泉壽與日月等

止酒

飲酒見真性此酒不可止一飲病三日止
酒寧獲已飲酒有別腸勸酒無惡意旣因

酒成病那識酒真味將軍罵不敬次公醒
而狂破面棖觸人不如持空觴人言我止
酒似是遣客計但使客常滿客醉我亦醉

于湖居士文集卷第三

于湖居士文集卷第四

古詩

昨日極暑今日極寒

昨日火流金今日風折膠昨着練布衣今
衣弊緼袍赤帝與玄冥凜凜隔一宵聊將
擁爐適換此揮筆勞冰炭欲盈懷炎涼不
崇朝幻生過隙駒是身九牛毛等是一寒
暑胡爲自談嘲萬法從心生心靜境亦消
悟此本來無絺綌同狐貂還當隱吾几試
聽萬竅號

三百五十六

二湖四

一

休矣

初得愛巖

高巖劃天門仄徑通乳穴隈堆青螺髻帶
嶠白玉闕外有虎豹蹲中恐蛟蜃蟄東榮
俯雷電西出挾日月萬壑生悲風六月不
知熱但覺駭心目未易紀筆舌平生山水
趣嶺海最竒絕洞府二十四未厭屐齒折
晚乃得游此餘地皆僕妾同來六七士嗜
好頗相躡舉酒酌山神慰汝久湮滅

與邵陽李守二子用東坡韻

兩李有佳句冰雪洒肺肝清越石在懸圓

熟珠走盤我家十二樓下俯千仞湍誰掣
白玉瑣借與二子看臨風度長遂瘴海爲
清寒卻立望九州隘陋非所安便欲馭長
鯤九萬扶搖搏神山在吾牖弱水空瀾漫
回首五千劫不費一指彈絕笑塵中年攝
提與湣灘

奉送李彥國還廬陵

李生來嶺南自挾書一束食簞寄簫寺吃
吃晝夜讀餘子讓頭角文作翻手速小試
不盡能它日真可卜里中老仙伯曾對玉
堂宿高節老彌厲名蓋斗南北掖垣我畏
友不愛萬鍾祿卷藏一丘下勲業所迫逐
子歸問道要儲作飢歲穀富貴偶然耳吾
欲子金玉

暑甚得雨與張文伯同登禪智寺

老火陵穉金聚作三日熱舟行湘江上蒸
煮到魚鼈黑雲起東北一震山石裂不知
雨來處但見風卷葉銀河倚天瀉高浪舞
飛雪只聽打蓬聲已覺涼意愜岸傍古佛
屋樓殿頗嵒嶮不辭衝泥去一看雨脚闊

吾宗紫巖客窮苦志不懾自我來浯溪奔走已旬浹我懶久廢學愧子來挈挈相携得偉觀爲子熾然說願子領話頭吾今指標月

丙戌七夕入衡陽境獨游岸傍小寺

七年暑中行道路萬里賒今夕已七夕我猶在天涯繫舡蒼石根人影散晚沙上岸是脩竹仄徑如行蛇茅屋四五間往昔佛所家經禪劫火盡舊觀初萌芽墻疊古瓦盆僧披破袈裟喜聞拄杖聲掃地自點茶何以爲我娛冰雪汲井花一洗十日渴分涼到童髻盈盈牛女期不着雨洗車踈星銀漢動新月玉鈎斜更呼老奚官卷蘆作鳴笳莫驚潭中龍聊起棲樹鷓

福巖 丙戌七月

行行山益高所見益以竒煮茶南臺寺更上千級梯道傍古時松閱世心已灰不與歲月競况受霜雪威路回聞鐘聲寶刹隱翠微排空寫金碧剏石著拱柝門前堯率

橋劫火昔所遺神龍厭庠陋一炬然枯其
譚笑舊觀還殿柱百尺圍老禪七十餘高
與此山齊大屋貯龍象空巖走金犀齋盂
細細參至味無鹽醯頗聞三生藏中有萬
寶齋佛牙舍利湧貝葉旁行稀剖蚌慈相
尊破匣血縷飛稽首所願觀爲洗往昔非
卻尋上山路擬看浴日池急雨忽留人吾
其少須之

湖湘以竹車激水杭稻如雲書此
能仁院壁

象龍喚不應竹龍起行雨聯綿十車輻伊
軋百舟櫓轉此大法輪救汝旱歲苦橫江
鎖巨石濺瀑疊城鼓神機日夜運甘澤高
下普老農用不知瞬息了千畝抱孫帶黃
犢但看翠浪舞餘波及井臼春玉飲醪乳
江吳誇七蹋足蠶腰背偻此樂殊未知吾
歸當教汝

贈黃司法

吾友黃外卿乃是天下士阿翁苦硬節御
坐留諫紙辛勤教其子不但爲科第一官

法曹掾整整老胥忌吾行桂嶺南所得但
吾子願渠自愛惜窮達初不計功名儻來
耳期子以千歲

宵征

畏暑倦長道呼童戒宵征三更渡前溪溪
水清且鳴舟人自相喚炬火如踈星俯視
亂石多仰見北斗橫微微白露下礫礫宿
鳥驚竹輿出林薄十里月漸明光采散草
木涼意侵冠纓

汎湘江

十日行湘江湘水清而温不療亭午渴却
憶土井渾道傍古剎竿着屋高樹根飛泉
出山腹甘冷冰瓶盆何止解百憂一洒塵
埃昏設供者誰與稽首兩足尊

上封寺

七月十五夜我在祝融峯與世隔幾塵上
天通九重手取白玉盤納之朱陵宮羣山
羅豆登萬籟酣笙鏞盡酌五湖水勸我酒
一鐘爲君賦長言寫向西北風

一作爲君長言
謠寫向東南風

岸傍偶得木犀

天公不求金富媪不復藏居然土同價散
作草木芳英英園中葵一心傾太陽采采
籬下菊令汝壽命康惟此木之犀更貯萬
解香雄姿傲霜雪鱗甲森青蒼三賢鼎足
立正色凜相望豈比桃李徒紅紫紛披昌
聊息貪者心來上君子堂歲晚從我遊冥
汝兄弟行

王弱翁與余相遇漢口賦古意贈

別

我舡行荆江厭此江水渾北風知人意引
着清漢濱漢濱有佳人心與漢水白涉江
弄秋葉喚客踏明月明月永相望佳人不
可忘期君以千年珮我明珠璫

贈朱遠遊

遠遊何方來峩峩古衣冠袖中三百篇貯
月白玉盤溪清石瀨急雪凍銅壺乾有如
山澤仙外瘠中氣宇便合朱絃彈細着青
瑤刊懷哉人未識飛步江風寒

和張欽夫尋梅

寒梅本無心適與春風期孤根擢歲晚桃

李更媚之取我碧玉壺薦此白雪枝故人
不可寄耿耿空自竒故人隔湘江獨立知
者稀采香正滋蘭忍飢不食薇拏舟許過
我此約不可違江南煙雨村願與子俱歸

黃龍侍者本高覓詩

高禪本儒冠誰令着伽黎勞渠千里來贈
我一卷詩句法有源流人物乃清苦不用
追九僧政須越諸祖君家寒巖師今代僧
中龍持此送君行更去問乃翁

題濁醪賦後

三十一

二湘集六四

二

右三

仇君在長沙未嘗出門養丹火三十
年不惜分人屢起死又善釀山東酒
李卿寶文所爲賦濁醪也此軸留余
所半載其猶子洪自長沙來荊州求
跋乃書一詩併歸之幸呈似南軒先
生或肯同作

仇公昔釣璜乃得丹竈術閉門養真火
甕釀新秫酒熟分四鄰丹成活千人窮巷
不改樂一室長如春我知酒中仙歲晚當
得度乘雲見東皇請誦濁醪賦

屢登橫舟欲賦不成阻風漢口迺
追作寄趙富文揚齊伯

已過漢陽岸却望橫舟山秀色挹不盡西
風將夢還我昔登橫舟最愛漢陽樹橫舟
今不見樹色只如故公舟在青冥我舟一
浮萍闌干試拍手我亦同舉酒

棲真寄南康錢守

憶昔姑蘇臺實與君子別一別已六年音
書間何闊我行半天下塵土汙須髮君亦
抱艱棘衣袂洒清血今日復何日相望一
山隔我領通玄府乃在廬山北君宦山之
南兵衛森畫戟無由接杯酒但可共明月
作詩付郵筒聊復寄消息

黃子餘自海昏見予於九江欲行

爲賦此詩

昔我初識君乃在潯陽城卻數已十年此
地還見君積雨楚水高落日淮山明我病
不舉酒何以娛佳賓我行不可留明復與
君別悠悠千里情還當付明月

勸范東叔飲

今代太史公四海范氏門斯文十世澤斑
斑被諸孫我識叔西父白玉比粹温今來
見令弟俊氣百馬奔一第溷子耳勿愧而
家尊臨分無多言更酌老瓦盆

留題彭澤故縣修真觀

五月問脩途今日一百里莫投彭澤縣愧
此邑中士古觀官道傍借榻暫少憇折腰
向道士乞我五斗米聊爲奴僕飯明日更

早起

一本作借榻容少休高
林度清風似爲客子謀

湘中館

雲去月在沙潦淨秋滿川北斗掛落木西
風送歸船去年過湘中夜半投馬鞭篝燈
洗塵土所見只屋椽雞鳴問前途殘夢兀
擔肩那知闌干外有此山水妍微微清露
溥稍稍明河偏孤光耿自照靜極忻所便
身世兩悠然吾其遂飛仙

中隱

吾家中隱君才比萬斛泉短小精悍姿一
劍當雄邊去年郴州賊俯視衡嶽顛君從
襄陽來孤忠作戈鋌譚笑百雉安淨洗湖

嶺煙謂當疇王勳金印如斗懸言歸遽如
許此意誰爲宣小隱即居山大隱即居墨
夫君處其中政爾當留連早晚有詔書喚
君遠朝天欲爲中隱遊更着三十年

贈師永錫併簡子西文潛

永錫西方來持論乃據正健飯不飲酒自
詭作縣令我已識淮父但未見伯渾林林
三珠樹知是難弟昆上方顧中原有君但
無臣豈有千里足而令走跋跋願子徑入
關請對通明殿此事定在我不必問和戰

于湖居士文集卷第四

于湖居士文集卷第五

古詩

萍鄉境上有驛傍有老杉餘百本
余過而愛之驛無名余名之曰愛
直而爲之詩又以告邑大夫趙君
公廩曰使繼自今爲令者幸如君
之賢也則此杉長存不然將斧斤
斯民以自封植於杉何有

此杉已百年林立官道側鬼神所訶護斤
斧不敢迫愛此遺直姿凜凜有正色未云
支大厦聊以蔭行客作詩調令尹爲我驛
壁刻但使杉長存懸知令清白

遊千山觀

朝遊七星巖莫上千山觀東西兩竒絕勢
略領海半長江寫縑素疊嶂俯杯按中有
萬雉城鐵立不可玩伏龍起行雨老樹舞
影亂衝風挾驚電意恐崖谷斷路懸石磴
滑衆客紛駭汗嵌空偶自託發若鳥集灌
須臾便開霽杲日麗清漢卻坐山巔亭容
我烏幘岸長懷付尊酒別語不容判會須

九垓外與子期汗漫

庚辰二月夜雪

夜半雨鳴廊晨起雪暗空不減臘月寒故
作昨日風融銀擁山腰飛花滿裘茸辦此
了不難咳唾煩天工纖纖園中花一夕無
光容凜凜庭下松巍然兩蒼龍

張欽夫筍脯甚佳秘其方不以示
人戲遣此詩

使君喜食筍筍脯味勝肉秘法不肯傳閉
門課私僕君不見金谷饌客本萍蓬豪世
藉此真成癡但令長須日致饋不敢求君
帳下兒

蒙和荅益竒輒復爲謝

齋厨極蕭條晚食以當肉公來共蔬盤留
語輒更僕平生懲沸仍吹虀欲了官事渠
能癡何時竟作淮南歸擊鮮校獵從廬兒
張欽夫送筍脯與方俱來復作

筍脯登吾盤可使食無肉鮭腥辟三舍棕
楫乃臣僕書生長有十甕虀却笑虎頭骨
相癡得君新法也大竒且復從游錦綉兒

勸農以湘波不動楚山碧花壓闌
干春晝長爲韻得干字

積雨已連月長沙尚春寒今朝定何朝喚
客來江干問訊湘西寺霧重江漫漫聊須
萬斛舟渡此千尺湍老松如相迎翠落頭
上冠却望城中花寶髻垂珠鬢勸農有故
事般樂非所安薄晚會春園老稚隨馬鞍
彘肩侑尊酒呼喚來同盤從容及鄙事爾
汝開心肝我是耕田夫偶然此爲官飽不
知稼穡愧汝催租瘢願言各努力長年好
相看

二二二二二

二湖集五

三

劉大有

陳仲思以太夫人高年奉祠便養
卜居城東茅屋數間澹如也移花
種竹山林丘壑之勝湘州所無食
不足而樂有餘謂古之隱君子若
仲思者非耶乾道戊子六月某同
張欽夫過焉裴回彌日旣莫而忘
去欽夫欲專壑買鄰欽夫有詩某

次韻

平生交游中此士故耐久不折爲米腰頗

袖斲輪手卜居並東郭草草宮一畝日課
種樹書箋題徧窻牖花草當姬妾松竹是
朋友上堂娛偏親家飯隨野蔞客至即舉
詩興來亦沽酒清溪遶屋角高木老未朽
翻翻荷見背戢戢魚駢首幽觀天所藏勝
踐我獨後不因南軒君茲遊幾時有爲君
便買鄰溪南好岡阜我喜君亦狂呼兒挈
尊旨一洒塵埃曾快若苗去莠夜涼佳月
出人影散箕斗恨我當先歸君能小留否

贈陳監廟

三百九十一

二湖集五

四

列八有

陳子居城東茆屋三四間下有五畝園灌
畦泐清灣松栢充羽葆荷芰作髻鬟再拜
太夫人壽比衡麓慳我早與子遊期子到
孔顏察子意甚真不與時輩斑扁舟漾荆
渚餘子頗謗訕大道甚坦夷勿歎行路難
彼自種荆棘吾寧翦榛菅一醉乘秋風共
此霜月彎

送邵懷英分魯直詩韻人間風日
不到處天上玉堂森寶書得書字
將酒澆君車問君行何如初無十萬錢但

有一束書往昔千官班渠曾綴簪裾日月
九門隔江湖十年餘老榦久凌剝寒灰費
吹噓今者尺一追問津承明廬蓬萊道家
山紫極帝所居功名儻來爾步武當徐徐
遙岑出踈林淺水行游魚臨分再三囑音
信莫我踈

送張定叟

戊子歲二月定叟如南山行李太忽草問
君何當還敬展南陽阡永慕涕已潛畢事
却登攬紆子悲悴顏羣峯最高處眼界窮
塵寰紫蓋款佛刹黃庭扣玄關夜榻藉雲
衲曉窓闖煙鬢野飯薦筍蕨幽尋翦榛菅
酒賤可痛飲詩成要重刪勿作賈胡留閨
人賦刀環歸時買竹鼪小破行囊慳

朱陵洞

黑雲起我趾白雨過山脚卻立朱陵洞一
望紫虛閣神丹吾已必仙臂真可握試向
靜處聽空濛有笙鶴

題屏風送裘甫歸臨川

不見已四年既見還作別贈以墨竹屏况

此君子節歲月不我留玉立空山陰願言
無相忘因風時寄音

送道州酒與吳伯承

陽城所臨州酒味猶清醇我病不能飲負
此盎盎春髯吳燒苦筍喚客車連軫名酒
隨惡詩掀髯一笑鞵

葵軒觀筍

葵軒新筍生戢戢水蒼玉脫籜便林立爾
輩殊窘東黃梅四月雨念子亦良苦十二
鳳凰鳴秋風何處聲

二湖集五

卷五

五

劉文甫

贈尹童子夢龍

長沙尹氏子四歲誦萬言青松一寸長歲
晚當摩天終爲棟梁用莫作桷與椽斫根
剗其明本瘁末亦顛持此勸乃翁閉門養
真源

一覽亭

城中十萬戶亭脚五千丈小退鴈鷺行却
立雲雨上主人心如坐鏡中像沙尾
是我舡煙波更空曠

睡起

睡起有佳聲蕭蕭竹間雨
蒿廬澹無營一榻不受暑
微颺入牖來喚起香中縷
撫卷忽超然空梁走飢鼠

吳伯承送苦筍消梅用來韻各賦一篇

問訊湘西筍政得夜來雨
高標諸枉直餘味良藥苦

又

脆圓供小摘不待四月雨
新詩同咀嚼學子心獨苦

戲書贈蘇待問

從公覓此紙欲與蘇待問
醉中墨鷓黑北風起雲陣
明朝酒醒看爲子傳心印
子若不領略取火燒作燼

贈震山主

震公住山年與我共壬子
瓦礫化金碧願力一彈指
鄉來祖師禪風定月滿天
語子義第一飢餐困當眠

春盡日送聞人伯卿次家君韻

早年翰墨場未見心已親
筆底三峽流曾

次萬卷春省試文字相從未淹時欲別故
惱人敢賡老仙詩索去不用頻

洗塵贈張立之判官

立之居糟丘曾有萬斛塵歸來卧西窗涇
渭自此分汙泥生芙蓉榛墟有白雲莫厭
吏事煩願子清天君

王龜齡賦喜雨諸賢畢和某客行
半月未嘗晴也故於末章云

久旱一雨足高低水平分老農爾何知史
君甚艱勤史君家鴈山出作無心雲四海
方立槁須君來救焚

又

客行苦淫潦道路渺不分十步九掀淖眷
言僕夫勤昔旱欲訟風令雨當誅雲我已
寫綠章擬向清夜焚

八桂堂池上賞蓮納涼

山月半池白水風終夜涼蛙聲作鼓吹芟
製爲衣裳萬里俱遠客三人同一觴但使
嶺海豐此樂未渠央

前日出城苗猶立槁今日過興安

境上田水灌輸鬱然彌望有秋可
必乃知賢者之政神速如此輒寄
呈交代仲欽秘閣

筒車無停輪木規着高格杭稔接新潤草
木丐餘澤府公爲霖手號令行頃刻願持
一勺水敬往壽南伯

南臺

我遊衡嶽巔路半此歇脚風雷駕飛殿日
月隱傑閣闌千十萬里仰視天一握遂訪
紫虛君歸時騎白鶴

書懷

七夕在衡陽九日在蘄州秋風浩如海我
行尚扁舟破帽不堪落菊花空滿頭醉眼
忽瞠若悠然過滄洲

元宵同張欽夫邵懷英分韻得紅
旗字

佳月妬纖雲微和扇東風聊持一杯淥共
此千燈紅吾宗延閣英聖學與天通且最
治郡課遂收活國功

又

邵子坐學官今日有詔追道山萃竹帛武
庫森戈旗文武要兩有腐儒不足爲明年
燕端門舉酒還相思

贈盧司法

逃秦盧博士讀書不讀律江陵法曹椽移
病滿百日燕坐供佛香青燈照繩床肺熱
今無恙一本作好門前春草長

于湖居士文集卷第五

